

Dörfligeischer 2016

Üsi Stadt die muess jetz spare, süsch wird die Kasse läär,
Et la pauvre Silvia Steidle hett's drum schampar schwär,
Alli müesse jetz dra glaube, äs wird gschart, äs isch e Qual,
Gaschessu - Schwanenkolonie - und ou Schachfestival,
Im Tierpark müesse d' Tierli hungere, ir Stadt gits kei Schissi meh,
D' Trottoir wärde weniger putzt, das chasch de dütlich gseh,
Nume wenn blutt ir Stadt umeloufsch - dasch Kultur, das darfsch,
U do chasch de sicher sy - steckt dir dr Nemitz no Gäld i Arsch !

Ou üsi Faschingszunft die muess jetz spare, süsch wird die Kasse läär,
U dä armi nöi Kassier, dä hetts nid liecht - nei schwär,
Mit Recycling chöit dir alli hälfe - tüt di Chance nid vergäh,
U am Schluss bitte alli Bölleli am Saalchef umegäh !

Ou mir Dörfligeischer müesse jetz spare, süsch wird die Kasse läär,
Billigi Kostüm mache, das isch doch gar nid schwär,
Spare heisst's ou bi de Bilder u natürlech bi de Värs' ,
Drum säge mir euch jetz guetnacht - salut - und tschüss - das wär's !

I bi dr Blatter Seppeli, ir ganze Wält bekannt,
Bi früecher scho e Bschisshung gsy, hüt bini e Vagant,
U stoh-n-i de vorem Hölletor, steit scho dr Platini da,
Viens mon cher, ta place est là - u d ' Millione chasch umeha !

Mit dr Tissot Arena hei mir ds Biel jetz e tolli Sach,
U scho purzle die erschte Rekorde unger däm nöie Dach,
100 Stunde Curling spile, das finge mir ganz toll,
Aber ou am meischte lääri Läden - u stundelang keis EHC Goal !

Am Guisanplatz a beschter Lag tuet äs nobus Hotel sto,
U d' Migros mit ihrne huffe Töchtere tuet jetz dort ine go,
Jetz isch dä Umbou scho abgeschlosse, do si mir würklech froh,
Denn ändlech - ändlech - hei mir ds Biel e Pizzeria übercho !

Internet isch überall, alles wird überwacht,
Ou im Huushalt isch alles vernetzt, am Tag und i dr Nacht,
Ou ds Schisshuus tuet Bluet-und Läberwärte grad am Chüelschrank übersteue,
Dermit dä sicher weiss ob är Joghurt oder Bier söu bsteue !

Wenn wieder mou hesch grossi Luscht, äs so richtig z' mache,
U seisch am Partner: " Du säg mer doch so richtig dräckigi Sache,"
De geit de d' Poscht ab ganz verruckt, das hesch no sälte gseh,
U di Partner flüschteret dir i ds Ohr : "Diesel-Motor VW" !

Üse Gmeindrat hetts wieder einisch gschaft u steit ohni Budget do,
Im Gägesatz zu dene hei mir Geischer üses Budget scho,
Mir spare u sammle drum für die wo kei Subvention meh söu bercho,
U hoffe dir heit bis am Sunntigobe ou öppis i die Söili to !

